

Վ. Հ. ՓԱՓԱՋՅԱՆ, Հայաստանի առևտրական ուղիները միջազգային առևտրի ոլորտում
16—17-րդ դդ., Երևան, ՀՀ ԳԱ հրատ., 1990, 195 էջ:

Արևմտա-եվրոպական պետությունների՝ Արևելքի երկրներ գաղութային թափանցումների պատմության ընթացքի բազմակողմանի ուսումնասիրության մեջ կարևոր տեղ են զբաղեցնում այդ երկրների սոցիալ-տնտեսական, առևտրական հարաբերությունների բազմակողմանի ուսումնասիրության հարցերը: Ինչպես համաշխարհային, այնպես էլ խորհրդային պատմագրության մեջ այս հարցերի վերաբերյալ հարուստ դրականություն կա, որտեղ առաջ են քաշվել բազմաթիվ, երբեմն հակասական տեսակետներ: Առկա ուսումնասիրություններում գրեթե բացակայում են այնպիսի հիմնարար տեսություններ, որոնք մշակված լինեն հարուստ, բազմալեզու, նորահայտ նյութերի մասնագիտական ուսումնասիրության հիման վրա: Այս առումով, առանց չափազանցության, դիտական մեծ արժեք և հետաքրքրություն է ներկայացնում պատմական գիտությունների թեկնածու Վ. Հ. Փափաջյանի մենագրությունը, որը պարզություն է մտնում այդ բարդ պրոբլեմի բազմակողմանի ուսումնասիրության գործում: Ուսումնասիրությունը գրված է հարուստ և բազմալեզու գրականության հիման վրա: Հեղինակի կողմից ուսումնասիրված և օգտագործված հայերեն, պարսկերեն, անգլերեն, ֆրանսերեն աղբյուրների զգալի մասը դիտական շրջանառության մեջ է դրվել առաջին անգամ: Հատկապես մեծ արժեք են ներկայացնում Նոր Զուղայի ս. Ամենափրկիչ վանքի արխիվում պահվող պարսկալեզու վավերագրերը, որոնք մինչև վերջերս անհասանելի էին ուսումնասիրողների համար:

Գրախոսվող ուսումնասիրության հենքը կազմում են վաճառականների, ուղևորների օրագրությունները, ուղեգրական գրառումները, կատարված հայերի կողմից: Այս կարգի աղբյուրների մեծ մասը առաջին անգամ է ուսումնասիրվում պատմագիտության մեջ: Հեղինակը, դարձյալ առաջին անգամ, գիտական ուսումնասիրության մեջ է դրել Նոր Զուղայի սբ. Ստեփանոս վանքի մատենադարանում պահվող պարսկալեզու վավերագրեր, որոնք վերաբերում են առևտրահարկերին, առևտրական ուղիների ապահովության կազմակերպմանը և դրանց առնչվող բազմաթիվ այլ հարցերի:

Աշխատությունը շարադրելիս Վ. Փափաջյանը մեծապես օգտվել է հայ, պարսիկ և թուրք հեղինակների՝ Առաքել Դավրիժեցու, Գրիգոր Կամախեցու, Սիմոն Լեհացու, Զաքարիա Քանաքեռցու, էվլիա Չելեբիի, Շարաֆ խան Բիդլիսիի, Հասան բեկ Ռումմու, Իսկանդար Մունշիի, Նասիր Խուրոֆի, Համադալա Ղազվինիի, Ֆազլուհ Ռաշիդ ադ-Դինի և ջատ ուրիշների գործերից:

Ուսումնասիրության յուրահատկությունը կայանում է նրանում, որ հեղինակի կողմից լայնորեն ուսումնասիրվել և օգտագործվել են նաև եվրոպական սկզբնաղբյուրները: Դրանք անգլերեն, ֆրանսերեն լեզուներով ուղեգրություններ են, առևտրական հաշիվներ, հաշվետվություններ, նամակներ, զեկուցագրեր և նման կարգի այլ փաստաթղթեր, որոնք թողել են եվրոպական ուղեգիրները, վաճառականները, կաթոլիկ քարոզիչները: Այս կարգի գործերից օգտագործվել են Ժան-Բատիստ Տավերնիեի, Ժան Շարդենի, Միշել Ֆերրիի և մյուսների գործերը:

Աշխատության առաջին գլխում պատմական լայն ֆոնի վրա մանրամասն քննության է ենթարկվում Իրանի առևտրի վրա աշխարհագրական հայտնագործությունների և թուրքական նվաճումների ազդեցության հարցը: Վերը նշված աղբյուրների և գիտական գրականության մանրազնին ուսումնասիրության հիման վրա հեղինակը եկել է այն եզրակացության, որ ավելի քան հարյուր տարի Աֆրիկայի շուրջը բացված ծովային ուղին չկարողացավ նշանակալից դեր խաղալ Իրանի և Արևմուտքի միջև կատարվող առևտրում: Այս առևտրի վրա ոչ մի էական ազդեցություն չունեցան նաև թուրքական նվաճումները: Մտահոգ լինելով նվաճված երկրներին հպատակության մեջ պահելու հարցերով, թուրք-օսմաններն իրենք չէին մասնակցում այդ առևտրին: Չնայած դրան, թուրքերը ձգտում էին նպաստել այդ առևտրի զարգացմանը:

Սեֆյան պետության և Արևմտյան Եվրոպայի երկրների միջև առևտուրը հատկապես ուժեղացավ 1639 թ. Իրանի և Թուրքիայի միջև հաշտության պայմանագրի կնքումից հետո, երբ

բարենպաստ պայմաններ ստեղծվեցին առևտրական քարավանների ապահով տեղաշարժերի համար: Մեծ շահերի հասավ առևտուրը Վնենտիկի, Հոլանդիայի, Անգլիայի, Ֆրանսիայի հետ: Հեղինակին հաջողվել է պարզել, որ Իրանի արտաքին առևտրի հիմնական մասը, իսկ հում մետաքսի ողջ արտահանումը իրականացվում էր Հյուսիսային Իրանի, Հայաստանի, Փոքր Ասիայի, Միջագետքի վրայով:

Այս գլխում մանրամասն քննության է ենթարկվել նաև անգլիական Արևելահայկական ընկերության և Նոր Զուգայի հայ վաճառականների ներկայացուցիչ խոշա Փանոս Քալանթարի միջև 1688 թ. կնքված առևտրական պայմանագիրը, ըստ որի անգլիացիները պարտավորվում էին իրենց նավերով տեղափոխել հայերին պատկանող մետաքսը: Սակայն այս պայմանագիրն առանձնակի արդյունք չտվեց: Քարավանային առևտրում հմտացած հայ վաճառականներին քիչ էր հետաքրքրում առևտրի ծովային ուղին:

Իր ուսումնասիրության երկրորդ գլուխը Վ. Փափազյանը նվիրել է Թավրիզ-Հալեպ, Թավրիզ-Զմյուռնիա առևտրական մայրուղիներին և դրանց հետ առնչվող հարցերին: Արևմուտքի հետ կատարվող Իրանի առևտրի այս զարկերակների գերը, հեղինակի կարծիքով, հավասար չի եղել: Ողջ 16-րդ դարում առաջնությունը պատկանել է Թավրիզ-Հալեպ մայրուղուն: Սկսած 17-րդ դարի 20-ական թվականներից աճում է երկրորդ՝ Թավրիզ-Զմյուռնիա առևտրական ուղու նշանակությունը: Այդ երկու մայրուղիներն էլ հիմնականում անցնում էին Հայաստանով և հայերով քննակցված տարածքներով: Այս ուղիների վրա հայկական առևտրական կապիտալն իր ձեռքում էր պահում տնտեսական կյանքի լծակների մեծ մասը: Հեղինակը ճշտել է, որ Թավրիզ-Հալեպ առևտրական ուղու կայաններն էին՝ Թավրիզ-Մարանդ-Ջորսնուշար-Բանդիմահի (Բերկի)-Կարաքյոփրու-Արճիշ-Ադիլլեազ (Արժիկ)-Ախլաթ (Խլաթ)-Կարմոս-Դատվան-Բիթլիս (Բաղեշ)-Գիրկի-Խզու-Դիարբեքիր (Ամիդ)-Ուրֆա (Նեքեսիա)-Ջաֆարադուն-Այնթափ-Բիրլիկ-Հալեպ:

Առևտրական քարավանները Թավրիզից Զմյուռնիա անցնում էին հետևյալ ուղիով. Թավրիզ-Մարանդ-Ջուզա-Նախիջևան-Երևան-Էջմիածին-Աղջազալա (Երվանդակերտ)-Կաղզվան-Ջորանքյոփի-Էրզրում (Կարին)-Թոխաթ-Զմյուռնիա:

Առևտրական հիմնական հարկերին նվիրված գլխում առանձին բաժին է նվիրված թողմային և նրա վերաքման հանգամանքներին: Այս հարցն ուսումնասիրվել է պարսկական աղբյուրների հաղորդած տեղեկությունների հիման վրա: Առաջին անգամ Վ. Փափազյանի կողմից ուսումնասիրվել է 1565 թ. Թահմազ I-ի կողմից ընդունված հրովարտակը, ըստ որի վերացվեց թաղմա հարկատեսակը: Այս գլխի մեկ այլ բաժնում մանրակրկիտ վերլուծության է ենթարկված առևտրուղիների անվտանգությունն ապահովող ծառայությունների համար գանձվող ոահգարի կոչվող հարկի հարցը: Այն ժամանակ, երբ Թուրքիայով անցնող ուղիները շատ վտանգավոր էին, առևտրական քարավանները հարձակման էին ենթարկվում ոչ միայն ավազակների, այլև հենց նրանց կողմից, ում վստահված էր առևտրուղիների անվտանգությունն ապահովելու պատասխանատվությունը: Իրանում վիճակն ավելի բարվոք էր: Այստեղ ոահգարություն համակարգը որոշակի պայմաններ էր ստեղծում ինչպես տեղափոխվող ապրանքների, այնպես էլ քարավանային ուղեկցողների համար:

Հայաստանի վրայով և հայաբնակ վայրերով անցնող առևտրական ուղիները մեծ դեր էին խաղում երկրի սոցիալ-տնտեսական և մշակութային կյանքի զարգացման գործում: Այդ ուղիների գերի ուսումնասիրությունը աշխատության հեղինակին հասցրել է այն հետաքրքիր հետևություններ, որ միևնույն ժամանակահատվածում քաղաքական, տնտեսական և մշակութային կյանքը միևնույն զարգացման աստիճանի վրա չեն գտնվել: Եթե քննարկվող պատմական դարաշրջանում Հայաստանը գտնվում էր Սեֆյան Իրանի և Օսմանյան Թուրքիայի տիրապետության ներքո և քաղաքական ազատ զարգացման հույս անգամ չկար, ապա երկրի մի մասի տնտեսական կյանքում, համեմայնաբայն նրա կարևոր ճյուղերից մեկում՝ առևտրում, նկատվում էր զգալի առաջիադացում, որի հիմնական պայմաններից մեկը պետք է համարել 16—17-րդ դդ. Հայաստանի առևտրական ուղիների կատարած կարևոր դերը միջազգային առևտրում:

Աղբյուրագիտական մեծ արժեք ունեն ուսումնասիրությանը կցված հավելված փաստաթղթերը: Այստեղ տեղ են գտել Նոր Զուգայի և Ամենափրկիչ վանքի արխիվում պահվող, առաջին անգամ գիտական չըջանառության մեջ գրվող Թահմազ I-ի 1565 թ. հրովարտակը՝ թափա հարկատեսակի վերացման, Սաֆի II-ի 1634 թ. հրովարտակը՝ ոահգարության հարկերի մասին, ջուղայեցի առևտրականներին տրված արտոնությունների մասին, Կոստանդ վարժապետ Զուղայեցու «Աշխարհածողվի» Թավրիզ-Հալեպ առևտրական մայրուղուն վերաբերող

հատվածի նկարագրությունը, ընդամենը երեք էջ կազմող այս վավերագիրը գիտական տեսքի բերելու և հասկանալի դարձնելու համար Վ. Փափազյանին հարկ է եղել ճշտել և ծանոթադրել հարյուր երեսունից ավելի մաքսերի, հարկերի, դրամների, շահերի, քաշերի, ծավալների, ապրանքների տեսական տերմիններու Բավրիզ—Ձմյուռնիա առևտրամայրուղու Թավրիզ—Էրզրում հատվածի Ձաքարիա Ադուլեցու նկարագրությունների հիման վրա հեղինակը կազմել է բարտեզ, ուր ճշտել է քառասունից ավելի կայանների, իսկ ավելի մաքսատների և ուսհդախանների տեղերու Այս քարտեզները կարող են գործնական նշանակություն ունենալ այդ տեղիների ընդհանուր քարտեզի կազմման համար:

Սակայն պետք է նկատել, որ աշխատությունը շատ ավելի կշահեր, եթե հեղինակը նույնքան մանրամասն ուսումնասիրության ենթարկեր Սեֆյան կառավարության տարածքով անցնող մյուս, մասնավորապես Սպահանից դուրս եկող առևտրաուղիները: Ցանկալի կլիներ նաև, որ բացի թաղմա և ուսհդարի կոչվող առևտրահարկերից և մաքսերից վերլուծության ենթարկվեին նաև մյուս հարկերն ու մաքսերը:

Վ. Փափազյանի «Հայաստանի առևտրական ուղիները միջազգային առևտրի ոլորտում 16—17-րդ դդ.» աշխատության մեջ առաջին անգամ հաջողված փորձ է արված ցույց տալու Հայաստանի առևտրական ուղիների դերն ու տեղը միջազգային առևտրի համակարգում, նրա կարևորագույն ժամանակաշրջաններից մեկում: Այս հիմնական խնդրից բացի հեղինակն աշխատել է վերհանել հայ վաճառականների դերը միջազգային առևտրում, որին հայ վաճառականները ոչ թե պասսիվ գիտորդ էին, այլ ակտիվ մասնակից:

Ամփոփենք ասելիքը. Վ. Փափազյանի «Հայաստանի առևտրական ուղիները միջազգային առևտրի ոլորտում 16—17-րդ դդ.» աշխատությունը գիտական լուրջ հետաքրքրություն ներկայացնող արժեք է հայ պատմագիտության մեջ:

Ռ. Ա. ԱՐՐԱՀԱԾՅԱՆ

Պատմական գիտությունների դոկտոր